

漢川縣志卷七

山川志序

禹平水土主名山川天下之綱領不外是况一邑乎漢川當江漢之間地勢平衍高峻之山無多而水則滔滔浮浮其大較也大抵古今言水者利爲多倘因循苟簡失其故常則爲患滋大間嘗別其支派溯其遷流辨升沉較利弊籌疏濬凡湖河之大陂港之細條列具載撫茲山川必資幹濟之畧然後人得平土居矣志山川

山嶺 崗 畝 洲

伏龍山亦名福龍俗呼火口山在縣城內西北去治百

漢川縣志

卷七

山

一

餘步南連曹家山東南爲曾家山東接王家山西出西關外有仙人位石棋盤石蒲團石

明邑人王諫詩駟馬高車輕且都歸來耕釣傍江湖
勝收彭澤千畦秫不羨松江一尺鱸東郭每懷獨載酒王門應笑舊吹竽閒時倚枕西窗下休問從前九折途

明陳惠詩村南六月觀新稼便扇輕搖還策馬酷日當空暑氣驕乘涼久坐棠陰下 田村行處稻花香 一路薰風晝日長茆屋幾家竹籬外綠荷池浴雛鴛

鴛

陽臺山舊名羊蹄山俗呼仙女山在縣治西南一里周與陳旣交惡周沔州刺史裴寬自襄州總管請益戍兵並遷城於羊蹄山以避水卽此南史康熙己未五色芝滿崖谷徐方伯惺易名采芝白茅堂集

邑人周鏞曰羊蹄山見於南史名爲最古山形圓故以羊蹄取象神女陽臺之說本屬不經前志謂羊蹄爲俗名者誤楚之季年逼於強秦懷畱襄嗣正卧薪嘗胆之秋而遠離國都君臣荒宴卽使事可徵信亦當削而不書以符地志體例况十九皆寓言乎乃誤於寰宇記裴敬作碑一語輾轉附會致令飛來肆誣

山靈蒙垢俗語不實流爲丹青考古者當有定論矣知縣卓振清禁采芝山鑿石碑文曰邑以漢川名明乎其地處窪下瀕漢之臯環湖之內古所謂澤國也澤國而得以長存厥賴有境內一二高山維繫奠安之若采芝山者兀峙西郊城垣壇宇實依其麓尤爲地脈所鍾焉辛未秋余承乏茲土甫下車紳士周應侯周若鴻林鍾璜魏桓李應五鄧新等有諭禁采芝山鑿石之請周諮其故知附近居民陳段鄒三姓者采芝山之陰爲祖產日鑿其石以售人圖一家之利而不顧一邑之害是故亟宜有以嚴禁之顧小民何

知利之所在雖非其有猶將攘竊况居然爲其祖若
父畱遺之業乎謂曾歷經前令示禁而終弗克永禁
者亦固其所於是有人以買山之說進者公議值若干
捐費若干如數以與之諒無不可得也雖然彼非求
售而我強之於理既有未順彼守世產而我奪之於
情亦屬難安且無論三姓不肯交易卽交易矣而書
契券必有主名夫當年三姓買山之祖安知今日有
鑿石之子孫乎則今日主名買山之人又安保他年
無鑿石之子孫乎恐越時而於茲山覬覦復萌訟端
又起矣此以知公捐之說猶非不易之論不做之法

也余乃集三姓業民而詢之曰汝鑿山之石歲入幾
何答以不過數千文余又詢之曰母錢五十千歲入
子錢幾何答以可得數千文余謂之曰均之數千文
矣取諸鑿石勞不如取諸母錢逸矣汝其具契券入
官領錢五十千文去嗣後芝山之石不得鑿鑿則皆
當作盜論余捐廉買汝石非買汝山也其栽樹采薪
卜地營墓皆聽汝三姓自便三姓俱欣然諾卽呈券
領錢而去邑之士民間之莫不怵慰僉曰今而後采
芝山鑿石之禁始成鐵案矣余猶恐檔案之久而有
失因書此事之緣起勒諸貞珉以垂永遠若夫形家

之說謂茲山有關於學校風水得培養其磅礴積鬱之氣於土風大有裨益予雖未之盡信然異日泮水黌宮果能鳳起蛟騰爲家之華爲國之瑞是亦余之厚望也夫

明邑人尹賓商詩一笑青螺壓太湖登臨偶與酒人俱朝朝暮暮誰曾見爲雨爲雲未可呼樹挾風聲掀麥浪山啣霽景落平蕪數椽小築今相近日日鈞簾覽畫圖

施閩章詩我昔過漢渚丹閣俯清湍江洲滋芳草眷言日以闌回首郎官湖把酒天氣寒揭來二十載舊

遊成一嘆誰言洞池秀藪生山谷間嗚呼南楚地烽火久摧殘殺氣纏草木戰骨高屹巉嘉祥何蒸蔚靈卉鑽巖巒煌煌餘百本照耀森琅玕甯非兵革息林麓回歡顏達賢傾睹記嘉名錫茲山一洗陽臺陋刻碣層崖端憶我官臨陽九莖亦江干紛綸延眾賞流詠傳蕭灘遙知企松喬采采思晨餐何當同飽食奮飛生羽翰顧景星詩羊蹄一峯秀百里瞻孱顏何人強解事喚作陽臺山山靈不受誣精氣吐煙鬢現出三花瑞高下崖巒間迢迢起霞綺俯掇矜編爛潤色待巨筆遂有嘉名頌將母角里叟近在煙波灣

昔賢妙出處後進遠追攀吾慕漢陰老息機任往還
邑人龍文玉采芝詞奉獻中丞劉公詩駕言出西
郊羊蹄行采芝聞說輝朝暮五色紛陸離上嘗雲氣
覆下疑醴泉滋荷鋪三里到三秀若爲窺奚必投金
環衣帶自可持瑤草我所遇翕翹正色披隱見雙麟
翔依約五鳳儀允作郊廟薦非徒几硯宜

聖代休祥氣蒸茵出天施封內膏雨足彼苗呈昌期獻匪
截柱勞頌嫌刻石遲唐虞世未遠亦復藉療飢熊
蘭詩高唐夢本虛茲更幻中幻宋玉一寓言千秋成
實案神女來何方雨雲亦汗漫巫峯遠在川胡傳自

漢川縣志

卷七

山

五

江漢我來正新秋突兀湧層觀莊嚴匪蓮臺翠羽明
璫璨士女雜沓來乞靈茲山慣山花自幽香山鳥自
零亂流傳幾經年無庸辨真贗長嘯遄歸舟含情忍
回看

姚公山在羊蹄山西其北有令尹子文墓祠

紫甲山一名史家山在縣東十里又五里爲黃家山一
名黃甲中有盤龍峯山小別綿亘至黃龍潭西曰紫甲
東曰黃甲盤龍乃山之中峯也岡巒起伏潭水縈抱凡
九十九盤爲邑東南之勝又北二里許爲答蓮山

邑人傅垣登小別盤龍峯詩羣峯窈窕列煙鬟大別

遙連小別間禹蹟長垂吳楚燼千秋人上盤龍山

滿林風露夜如何絕頂高寒俯白波九十九盤秋色

遠月明處處有漁歌

紗帽山在甌山東又東爲馬鞍山咸豐五年鹽道常恩

領兵禦賊於此

詳軍政

雙山在縣東二十里府志云兩山對峙因名

小別山在縣東南十里形如甌亦名甌山左傳吳子伐

楚楚令尹子常濟漢而陣自小別至於大別是也東晉

初王廙刺荊州爲杜曾等所拒退保甌山竟陵內史朱

伺禦曾於揚口戰敗就廩於甌山卽此梁置甌山縣邑

漢川縣志

卷七

山

六

人張緒講學處

明茅光著詩吳楚茫茫霸業空浮嵐依舊護晴峯逢

人試問前朝事惟說當年導水功 邑人傅垣小別

山懷古詩小別崔巍漢水奔分爭吳楚陣雲屯子常

三戰雄圖盡孫武千秋故壘存日出松杉迷大麓夜

闌燈火辨遙村甌山高士能深隱巖壑清幽似鹿門

高觀山在縣東南三十里高聳可以望遠下有白龍泉

北連恩山魚陂山胡家山

吳邦治秋興詩秋林何颯沓秋氣益蕭森試向高觀

望秋雲一片心 漢以合爲廣澤緣分乃七沓沓白

沙灘遙想雲邊出

長山在縣東南三十餘里又北里許曰團山

小巖家山在縣東南三十五里臨白石湖東連大巖家山北里許曰羅家山上有廟

馬城山一名小觀山在縣東南三十五里有橋接漢陽界方輿紀要云下有馬城舖安志云馬城山形圓如盆相傳漢壽亭侯駐馬於此東北里許有大觀山又北有阿婆山冷靜山

龍霓山在縣東四十里與漢陽分界其山常有雲氣隱隱如龍府志云兩山並峙雲起則雨

漢川縣志

卷七

山

七

擔山在縣南十五里卽戍子坵上有關帝廟俗呼廟頭設有塘汎詳軍政府志云兩山並峙其形如擔

紙山在縣南四十里俗名側船山乾隆戊申五月大雨山有蛟飛去山東爲鶯子山又南爲龜山又東南爲蛇山

邑人林祥紱詩紙山老蠟潛山北聞雷欲飛不可得頭無尺木又無翼九天有路空一憶今晨山頭雨如織雷公電母互相逼吞吐朝霧勢莫測噓氣爲雲半天黑靈物一去山無色下有重湖水如墨嗟哉此山龍之國不到飛騰不相識他時天瓢供傾倒旱年爲

我蘇稼穡

蒲山俗呼漣山在縣南四十里梅城鄉

石鏡山在縣南四十里梅城鄉府志云山有巨石圓淨如鏡因名

吳邦治詩天地兩輪鏡無定是生沒不知此山中朝朝至蟾窟空山來客稀獨有扁舟興鷗鷺靜不飛落葉逗山徑

泐山在縣南四十五里梅城鄉突兀漢南眾峯蟠絡爲邑東南之勝唐武德四年置泐川縣於此韓愈曹成王碑行泐泐川今居民掘地間獲城磚下有小泐渡

漢川縣志

卷七

山

八

按泐正韻歷德切考工記石有時而泐俗呼歷遂訛作泐或省作力卽泐山舊志分載皆誤

吳邦治泐川樵唱詩古郭櫟林煙遠蒲蘆花雪樵唱一聲高擔頭荷明月

木魚山一名姚公山在縣南四十餘里南接老虎山東接仙師山仙師之東爲龍霓山踰龍霓之頂屬漢陽雙馬山一名章馬山在縣南四十五里梅城鄉

內方山在縣南五十里梅城鄉寰宇記枕江漢尚書內方至于大別孔注謂內方大別二山名漢水所經卽此山也崑山顧祖禹云或以爲禹貢內方誤也一統志云

禹貢內方卽章山在今荆門界此別是一山寰宇記誤
卜審山一名卜井山在縣南五十五里相傳梁簡文太
子建都於此詳名蹟山北爲石頭山西爲長山西北爲
黃婆山

鳳凰山在縣南六十里梅城鄉府志云世傳有鳳凰止
山上因名

騾子山俗呼驢山在泐山西北

馬耳山一名馬鞍山在縣南六十里東接四顧山西接

獅子山獅子山北有古樹一株俗呼皂莢樹老幹杈榰蟠根

拳曲土人呼爲獅子尾禁止砍伐

漢川縣志

卷七

嶺

九

龍門山在縣南六十里下臨長河宋邑人黨仲昇敗金

兀兀處詳軍政今居民時掘得折戟之屬於其上山麓

有洞曰龍潭禱雨輒應東爲螺獅山有仙靈遺跡

嶺

走馬嶺有二一在縣南二十里梅城一在縣西南一里

煙墩嶺在縣東十五里甌山

會駕嶺在縣東南三十里梅城二里嶺界山水之交前

代嶺北皆水一渡越三十里達今之仙女山渡者皆會

聚於嶺故名萬古樓南樓東樓舊址尙存今嶺北悉淤

爲平陸舊志稿南里許爲童家嶺又南爲陳家嶺

姜家嶺在縣南梅城鄉北五里爲軍戎嶺又北爲雙鳳山

長城嶺在縣西南渡襄河而南至梅城三里白吳公嶺管公嶺舊名管公潭在縣西南四十五里

中嶺有三一在縣南江西坑一在縣西喻家坑一在縣西北麋溝坑

兆仙嶺在縣西九十里沉下湖西北或作趙林御史晉世居其地

太平嶺在縣西九十餘里南湖西南

顧家嶺在縣北十里顧侍御居其地

漢川縣志

卷七

嶺

十

松石嶺在縣北三十五里大赤鄉

青蒿嶺在縣西北六十里周陂鄉風門河西北蘆洲地也

嶺

松林崗在縣東南二十五里繫馬口東

賽子崗菜子崗俱在縣南

石龍崗在縣南四十里崗石紋如龍鱗故名

吳邦治詩牧牛草澤深撒網童兒喜莫待風雨來恐驚卧龍起

白潭崗在縣南五十里

避水崗在縣東北二十里一統志云相對有破岡俱潰水所經

按破岡卽破港口俗呼破港河湖水由此入柘樹口

會潰水今漸淤淺

櫟林崗一名栗林崗在縣北七里

裘羊崗顛窰崗俱在縣北三十五里大赤鄉

千子崗在縣西一里采芝山南

龍耳崗在縣西北四十五里魏清風處士閣故居府志云西有龍耳湖東有龍尾磯

酆王崗在縣西北六十里大赤鄉麻河渡北

漢川縣志

卷七

畝洲

十一

花兒崗在縣北六十里與應城接壤

畝

徐家畝在縣西南三里

白馬畝在縣南四十里西南十里爲袁家畝又西爲車家畝

橫山賽畝在縣南七十里半屬漢陽

簞子畝鯽魚畝俱在縣西十里

三湖畝在縣西三十五里沔漢湖濱

清水畝在縣西九十里南湖垸北本蘆洲地今沉沒

周家畝在縣北十五里

十八里畝在縣北三十五里明萬曆時障隄為坑今廢

詳隄

喻家畝在縣西南八十里居民障隄為坑詳隄坑

洲

觀洲在縣南三十里舊傳梁簡文帝太子建都卜審山設

官駐守於此至元末沉沒舊志稿

雞公洲在縣西响水約漢北支流所經也今淤

黃木洲李河洲何家洲火頭洲中洲雙湖洲一名雙河

洲真武洲俗呼真木洲俱在縣西九十餘里南湖官坑

北皆蘆洲地今多就沉塌

漢川縣志 卷七

畝洲

三

毛家洲在縣西百里黃金湖西亦蘆洲地

川 河 湖 港 潭 溝 口 塘 堰 池 泉 井

漢水即漾水亦曰沔水隄防考云俗呼襄河以上流自

襄陽來也源出陝西甯羗州北之蟠冢山東流至白河

縣入鄖陽府經均州襄陽安陸及潛沔至天門所屬之

牛蹄口南北分流正流至沔屬之脈旺背入漢川又東

六十里至廟頭汛又東三十里至繫馬口汛又東北三

十里經縣城南又東六十里至涇口入漢陽界過大別

入江

禹貢蟠冢導漾東流為漢又東為滄浪之水過三澌至

于大別舊志云漢水自襄陽來土人謂之襄河至沔屬之脈旺翳人縣境東流六十里至廟頭汎又東三十里至繫馬口汎又東北三十里經縣城東南又東六十里至潰口會潰水入漢陽界東流一百二十里入江

水利考云漢水經諸陂澤至景陵縣東分流一由黑流渡經張池口竹筒二河分入漢川劉家塢爲正流一由天門小河口漁新河中臺河經漢川牛角灣出風門河者爲支流二流會合經潰口蔡甸並出漢口

水道提綱云漢水源流共三千里合陝西漢中興安商州河南南陽湖北鄖陽襄陽安陸荆門州漢陽七府二

州之水古與大江並稱朝宗不誣也又云漢水正流至潛江縣北境之大澤口西北有支津西通荊州府南通監利縣東南通沔陽州達江正流又自大澤口折而東北流張集港南又分支津南經潛江縣城之東北又東南與沔陽諸湖達江又云正流東南至沔陽仙桃鎮又分爲支津南流爲白泥湖赤野湖至沌口達江

按此漢水分支達江之三大支津也正流自潛沔間分爲數支津卽有暴漲其勢亦殺今則支津淤墊甚者絕流向之分爲數流者合爲一偶值淫潦其勢浸天漢川居其下游所以受害尤甚也

邑人林鍾任曰漢水正流至潛江北岸張集港又分
支津由牛蹄口東流至縣屬田二河入境又東流經
祖師殿六渡灣至沉下湖入三臺湖合流入涓水東
流至張池口又分支津一支流入沔屬之脈旺觜會
正流一支進張池口東流經迴龍灣小里潭東北流
爲竹筒河又北流至邵家觜又東流至葱擔溝經府
河口會涓水出涓口入漢

水道圖說漢水自陝西東流入境經鄖陽府合曲遠
河陡河又東南經襄陽府合曾河丹河粉河唐河白
河蠻河豐樂河又經安陸府西荆門州東合樂鄉河

南出一水通荊州府諸湖又經漢陽府南通沔陽州
赤野湖又東合三臺湖會涓河口涓口又合澧河而
東與大江會丹河白河唐河俱自河南南流入境經
襄陽府入於漢楊葉湖在安陸府東中水河內河皂
市河俱滙焉其東南爲三臺湖南入於漢

涓水水經注故清發水也左傳定公四年吳敗楚於柏
舉從之及於清發是也方輿紀要云源出隨州大洪山
黑龍池經德安府過雲夢入縣界過劉家壩至涓口入
於漢水水道提綱云此水源流長五百餘里

漢水寰宇記源出鄧州長壽縣磨石山東南流名溼水

至復州竟陵縣界名汶水又東南流入汶川縣入滙
富水崑山顧炎武云源出京山關王嶺東流爲三汶河
石板河水注之經應城界入漢川讀史方輿紀要云源
亦出大洪山經京山縣流入應城界南流經應城西合
諸溪水經應城縣南四十五里爲梅家港又南五里爲
八埠口入漢川縣境會於漢水

白水方輿紀要在縣南七十里自沔陽流入縣界東出
沔口其支流經鳳凰山過繫馬口入白子河與沌水合
今水道已塞惟夏秋水泛可通舟楫

襄河中流南北分數支津北一支自牛蹄口至乾驛入

漢川縣志

卷七

川

五

田二河至張池口出脈旺觜入漢

襄河北一支自田二河分流經祖師殿六渡灣至沉下
湖梅家港入三臺湖出百觜與滙水會

一支自張池口分流繞迴龍灣小里潭排子口至東湖
流水口直注教子臺出風門經沔汶湖松湖滢洞合流
而東會於滙水此故道也近則由鰕子溝出邵家嘴會
百觜河入滙水

一支自廣公嶺響水灘出城隍港入漢

一支自廟頭繞江西皖麻埠港入縣東迎恩橋北通騰
池橋環繞西北通慈湖松湖出楊子港與滙水合流

按後河自百觜以下至邵家觜與池口河流會西與應城河會東流至麻河渡蔥擔溝迤南爲楊子港與松湖慈湖諸水會迤北與溇水會爲府河口府河自劉家塌匯安河斗落河箕河同入於溇口

以上四支爲漢水以北支津

襄河南一支自仙桃鎮下南經蓮子沱過西江亭南河渡入漢陽界出沌口入江

一支自楊林溝至西江亭朱龍湖經豬龍潭纏漢陽三汊會白水

一支自兩河南秋江河繞南河渡白水河出小口達漢

漢川縣志

卷七

川

六

卽白水故道今淤

以上三支爲漢水以南支津

又天門河會鍾京諸水經永隆漁新河繞青山入天門縣治巾臺河至會河口達陳選口入縣界

皂角河源出京山割流河入天門界爲皂市過蒿臺至札營口會河口巾臺水合流入縣境陳選口

一支由蒿臺湖分流北至縣境張家渡裴左家渡入三臺湖

一支由張家渡分流南至赤壁河出毛家口陳選口與金帶河會

一支由蒿臺湖分流南至包家河出金帶河卽志所謂
赤壁河

天門水道考縣河自小河口截河經漁新河金帶河牛
角灣出風門考天門河由漢川之新鮮口至牛角灣沉
下湖皂角樹馬港會池口水出風門歸松湖慈湖未嘗
歸三臺也故道淤塞則由馮家灣楊腰陂入三臺湖今
復淤淺

五龍河自京山應城交界處由楊林出五龍河歸三臺
湖陳家河自應城至丁家嘴歸三臺湖

應城縣河自宋河經應城縣治黃家潭甯江口赤岸亂
漢川縣志 卷七 川 七

泥河入縣界邵家嘴下流會湏水

以上天門京山應城諸水統名縣河水又名山水
總滙三臺湖入縣西北鄉與邵家嘴竹筒河合流
湏水以入漢 俱舊志稿

河

騰池河在縣東一里舊志云縣舊無城水在學宮後自
明崇禎九年築城水在城北矣隆慶三年知縣張崇德
疏濬騰池口引松湖水東流達漢透迤五六里許萬厯
中再濬從縣東迎恩橋轉搬載口出會漢水上有騰池
橋其出口名烏柏口

明邑人林大本開騰池河口記畧江流東經襄郢三
澨之地每長夏暑雨漢沔一壑歲嘉靖庚申大溢墊
溺之虐川爲尤甚七年相仍民命不絕如綫矣戊辰
夏張侯瑱峯至降觀川原廉得其狀惻然曰厥陂洩
水從騰池河口而下則治矣遂議疏當道樂相之費
取諸贖鍰俛諸鄉閭之好義者不閱月而工訖深凡
八尺廣八丈有奇直出騰池口達於河與瀆水合流
大江下逝若犇民得平土而居之信導水之爲惠也
但經始之初工力未敷上流因湖尾爲河越四年辛
未水復大溢湖尾遂淤爲平地無復河迹長計四百

餘丈僉謂此而弗治前工盡棄適新侯嶼川段公繼
至以爲已任仍疏懇於當道得羨金若干敷土程工
遂成長河事舉於後工增於前治河始底績也嘗聞
史起鑿漳水於魏鄭國導涇水於秦穿渠以蘇民而
禾黍之咏照耀簡冊今侯決壅以導滯上媿永賴之
休而人文之責又有以仰裨化成之猷奚翅禾黍稻
梁之咏已耶是爲記

邑人周鏞云松湖爲近漢滙水大澤其徑自達漢者
僅此一路而倒灌爲害屢疏屢墊近數年間土人於
騰池橋下築壩橫截濁流不入清流亦不出遂使前

邑侯引流消水善政無復遺跡矣

腰帶河在縣南漢水支流自廟頭麻埠港經縣東迎恩橋北達騰池口環繞若帶故名

詳城池

朱家河喻家河油榨河在縣東南十五里漢水經流處白子河亦名白港在縣南四十五里舊志云大河口東流至沌口出江支流經鳳凰山即今南河渡流至兩河口與漢水合此口已淤今流入赤野湖至漢陽之蔡甸與漢水合

舊志寰宇記白水從沌水流入大江即左傳成臼省通志云杜預註成臼在今鍾祥縣寰宇記誤

漢川縣志

卷七

河

九

長河在縣南六十里漢南支津自沔陽仙桃鎮下東南流會沔陽諸湖水至打雁垸外入境歷西江亭燕士橋大河口南河渡滙赤野湖入漢陽境至沌口出江日久淤墊嘉慶十三年汪制軍志伊奏請以鹺商匣費開疏自官橋河以下改由漢陽太頭繞達蔡甸而入於漢民賴其利近復淤淺

南河在縣南六十里龍門山下漢南支津由長河東流至大河口以下又名南河宋邑人黨仲昇屢挫金兵於此

詳軍事

知軍黃幹築城紀畧曰開禧丙寅敵騎圍安

陸破竟陵漢陽之民逃奔江南者大半武昌之人日夜

望漢陽之烽火以爲安危向非漢川之民結集義士固
守南河與敵血戰則事未可知卽謂是也舊有渡曰南
河渡

明漢陽朱衣詩金兵渡黃河殺氣填南海吁嗟竟陵
城不破復何待多謝曹攝軍臨難色不改指揮黨仲
昇保有南河在至今鄂漢間天地留光彩

消渦涇河在縣北十里道光七年邑紳秦篤烈王慶長
等呈請勘詳奏准借項開成引松湖汜汜諸湖水入洪
湖出草廟口會漢

閏五月十三日奉

漢川縣志

卷七

河

廿

上諭嵩孚奏請借項開疏緊要水道一摺湖北漢川縣地處下
游爲眾水滙歸之區上年京山縣王家營堤墜潰決以致湖
河下注該縣西北鄉瀆澇益甚僅恃腰帶河澗口二處出水
難資宣洩經該督同委員勘明消渦涇草廟口二處必得速
爲開濬以利水道而除民困惟頻年被水民力未免拮据自
應借項疏辦着准其在於司庫現存商捐隄河生息欸內借
動銀五千兩交漢黃德道等督同府縣多集人夫卽將草廟
口消渦涇湖口水道趕緊開通尅期完竣務臨期認真經理
倘有草率偷減立即嚴叅懲辦如所挪銀兩不敷再行酌量
補給統俟來歲春間於受益各戶按畝分限徵還歸欸至傍

湖田地如有被淹歉收及水冲沙壓之處俱着查明分別照例辦理該部知道欽此

汪家河在縣東北十五里漢水經流處

安河在縣東北三十里源出應山南流出孝感縣境又流至柘樹口與澗水合

算河在縣北三十里源出應山經孝感縣境至柘樹口與澗水合原非長流水漲始通舟楫明嘉靖末衝決頗甚官民議築塞之未果今淤平

關前河在縣北三十里上通德安下達漢口崑山顧炎武云明嘉靖乙巳都御史姜儀命於關前河至港築湖

漢川縣志

卷七

河

廿

隄黨夾植以柳

夾河舊志水從羅白溝入下臺口爲劉家壩腰帶水久淤

秋江河有二一在縣北三十里南流入澗漸淤淺狹一在縣南三十餘里俗呼駛河龍車諸湖水由之出兩河口入漢今淤成平陸

邵家菑河在縣西北四十五里北接應城京山西通天門鍾祥爲西北皖賑湖河會澗入漢要津嘉慶十五年汪制軍志伊清理各屬水道奏准動項開疏兼開應城梅家港引流注之頗稱深暢今淺狹設有塘汎

詳軍政

包河省志在縣西北五十里

招兒河在縣西五十五里許小里潭下漢北支津舊自張池口流經小里潭沙臺寺分流由招兒河經雞公洲又南出城隍港入漢北出松湖會湏今多阻塞淤墊淮雞公洲下五六里許可行舟楫香花魏夏兩官垸之潰水賴以消洩

風門河在縣西北六十里

按風門河西接牛角灣河馬港河東趨古楓灣繞河汜廢垸出蔥擔溝爲漢北支流匯湖會湏故道明隆慶後淤塞始北趨鰕子溝出邵家嘴河

漢川縣志

卷七

河

三

史港河府志在周陂鄉自田二河至風門河

竹筒河在縣西七十里水利考云漢水經張池竹筒二河分入劉家壩者爲正流由牛角灣出風門合竹筒河者爲支流二流會合經湏口蔡甸並出漢口此故道也前明隆慶三年巡撫委官濬之復中堙

濬淤河總考畧曰漢水遷徙堙塞爲災議者曰上流之遷徙其害小下流之堙塞其害大故襄承之防水惟以修築隄防爲上策而其遷徙之勢非人力所能爲也若竹筒一河上接漢流下通漢口真如咽喉不可一日或塞者且勘查水道惟中淤十五里而其淤

平絕流者又止七里許今日治水患其必以此爲先乎近行承漢二府有司募夫開濬故河以通流矣但溪水之泥沙迸至竹筒河下口遇劉家埭河水一漲則沙廻而淤隨淤隨浚自可無目前大梗之患矣邑人周鏞曰此河前明嘉隆間卽屢塞屢疏現在一綫僅存夏秋水漲或可稍通舟楫至冬春則涸所以漲泛時大流灌人無地容水必旁溢諸埭而停積於汶松諸湖由新開之消渦涇河流入洪湖又北流至柘樹口支津亦淤墊無幾附近居民樹柵築壩希圖漁利節節阻塞漢川惟西北疆域最廣湖河汶港澤藪縱橫一綫涓滴汎退所消幾何稍遲卽麥收亦無望况近亦淤塞乎來大去小來速去遲年復一年甚至有來無去杞人之憂無所底也

金帶河在縣西北七十餘里周陂鄉富水由應城西河重石湖南來注之舊志云漢水東注最爲利害者爲金帶河故里諺曰金帶水流漫周陂收一半金帶水流急周陂最湮沒

牛角灣河在縣西北百里水利考云漢水由天門中臺河經漢川牛角灣出風門河合竹筒河者爲支流明嘉靖二十五年以後湖澤大半淤平而竹筒河牛角灣二

處又復中墜於是縣多水患隆慶初年承天知府何某
濬之今仍埋

田二河在縣西百里晉書元景山與樊毅戰於漳口二
河皆克卽此 詳軍政

按漢北支流由天門牛蹄口入境分二河北流西爲
重石河久塞東爲大橋口經祖師殿皂港河六渡灣
合襟於稅務口入三臺湖嘉慶十五年大橋口亦塞
重石河在田二河西牛蹄支河分流過史港堤經鐵石
磯入湖久塞

新口河在縣西百里西接天門湖河至陳選口分支北

漢川縣志

卷七

河

苗

流經山嶺溝匯三臺湖

赤壁河舊志在縣西一百二十里流出吳王口達於三
臺湖

五龍河在縣西一百二十里接壤應城源出京山林泉
山入境由楊林嘴東南流注三臺湖方輿紀要云源出
京山流入應城縣境分爲二流俱至於三臺湖下流入
漢川縣界入漢水府志云兩邑人民俱飲河水而語音
清濁互異水土之說信有之乎

義漳河在縣西南四十五里漢水自脈旺嘴入境至分
水嘴北流由此經三汊潭東下南岸爲車柱港康熙間

襄河奪港南徙故道遂堙

湖

橫湖在縣東五里舊志北接溢港湖洪湖流出破港口
經柘樹口會湏入漢今淤

按溢港湖逐年淤墊盡成平田同治九年爵相李鴻
章委官集士民勘丈區畫犁然

道觀湖在縣南關外東由腰帶河達漢

江西湖有二一在縣南五里濱臨漢水障隄爲垸道光
二年以後屢溢屢淤詳隄防一在縣南六十里

澤湖在縣南十五里土人謂澤渙湖今悉淤爲平地

漢川縣志

卷七

湖

七

明尹賓商詩輕風細雨忽初晴秋色澄空一葦平湖
上月明天似水山邊雲起樹如城舟穿蘆荻疑無岸
槳打芙蓉覺有聲不比桃源迷去路爾時心跡已雙
清

龍車湖在縣南十五里舊爲瀦水之區今成平陸

桐木湖在縣東南二十里繫馬口下三面皆山一面近
河逐年淤成平陸乾隆間居民障隄爲垸西北爲梅湖
上零殘湖前明設有河泊所官久廢舊志云在縣南二
十五里今盡淤不知所在

許家湖在縣東南三十里與漢水通

段莊湖在縣南三十里泐山東北舊與漢水通今淤爲平地

白石湖在縣南三十五里湖中長石且數十丈起伏旋轉鱗甲森然如龍蟠之狀名蟠龍石

按舊志白石湖與蟠龍石分載今訂正

魯班賽湖在縣南四十里

木頭湖在縣南四十里埕頭南近淤東二里爲西陂湖赤野湖在縣南四十里水道提綱云赤野湖爲漢南江北支渠總滙分爲二流一東流至沌口入江今淤一東北流至蔡甸入漢

漢川縣志

卷七

湖

其

卻月湖北通漢水首尾迂直形如卻月因名舊志云在縣南七十里今失其處

大松湖在縣北十八里順治三年佟部院養和禦賊於

此

詳軍政

一統志北二里爲小松湖西接瓜子湖五湖

北通楊子港

邑人周鏞云松湖接連汴汜慈曹等湖週圍數十里受濱漢各坑水爲漢川近漢滙水巨澤故道自松湖口流入楊子港出新河口會瀆入漢又在縣城開騰池河引湖水達漢厥後松湖流入楊子港之口淤塞騰池口亦淤道光六七年間邑人以瀆水無消呈請

籌辦當事相度形勢奏請借帑於城北二十里許之
消渦涇開通深河引松湖水入洪湖出草廟口入漢
曾希天詩湖濱薄暮望沙白水漫漫月影翻波翠
星光隱霧寒斷山連古木宿雁起迴瀾寂寞篝燈夜
誰憐襍被單

彌勒湖俗呼麋鹿西連楊子港由牛溝出柘樹口會涇
入漢要津近年高姓居民稱為軍業私築土埧壟斷魚
利號曰魚欄隄致西北鄉田地蘆洲無由涸復同治十
一年袁昌侯鳴珂勘詳奉督撫飭武左衛會同押令平
毀仍於每年秋後飭取縣衛并無再築土隄阻遏水道

漢川縣志

卷七

湖

七

印結呈齋備案

曹湖在縣西二十里東連松湖北通蔥擔溝

李灣湖趙家湖濫泥湖張陂湖大山湖菱角湖俱在縣
北三十里湖之最小者水皆由沙灣溝出府河口會涇
瓜子湖在縣西北三十餘里滙京山天門應城及邑西
北鄉諸湖河皖之水出蔥擔溝經府河口而會涇水
今淤淺

慈湖接連沔漢湖在縣西北四十里

毛會建詩落日半輪暗平湖一鏡圓舟移溪上樹橋
斷水中天載酒衝山靄隨花入渚煙隔林漁火動疑

欲到樽前

五湖舊志俱在縣西四十里

沔漢湖在縣西四十里北通五湖又北通瓜子湖

曾希天詩小憇晴川倦眼開菱荷香裏雨聲催湖光
百里澄如鏡惟見漁舟自往來

彭公湖水道提綱自東北而西南長六十餘里形如鯉
魚在縣西六十里濱襄河西抵沔東曰觀湖又東曰播
義湖今播義湖淤成平田 詳隄垸

李春耀詩水止含天濶天空映水深只無廬阜望如
接洞庭陰岸遠浮煙樹冰銷下野禽平生隨浩蕩不

漢川縣志

卷七

湖

其

用羨魚心

安漢湖亦名岡下湖在縣北二十里南連洪湖前明設
有所官今廢

汪泗湖臺湖俱在縣西南四十里側船山西今淤

土門賽湖亦呼土龍賽在縣西南四十五里泐山南

陶家賽湖小長賽湖俱在縣西南五十里白港西又東

北爲大長湖

清水湖在縣西北六十里接應城界湖水四時清澈因

名

朱龍湖亦名潭蓮子湖亦名淤俱在縣西南六十里

打雁湖在縣西南六十里

馬清亮過打雁湖詩菰蒲獵獵峭帆過鎮日西風捲
碧波擊節孤唵人不見鷺鷗飛處夕陽多

蓼湖在縣西七十里南湖坑東其南有鯉魚湖詳隄坑

南湖在縣西八十里濱漢水支流西有蔡陂湖白土湖
魚白湖謝湖北有渣角湖沉下湖明隆慶間民人於湖
渚障隄爲坑延袤八十餘里詳隄坑

按白土湖自嘉慶十五年已淤成田

天門熊士鵬同張竹樵泛南湖詩湖水無邊際空濛
泛暮煙舉盃酬好月持楫看遙天秋柳依霜白漁燈

漢川縣志

卷七

湖

芑

九浪然高譎知已在不比剡溪船

沉下湖卽今南湖下坑在縣西九十里舊志謂在縣西
南誤方輿紀要云縣境諸湖凡數十此其最著者前明
設有所官今廢

邑人林鍾俊詩茹屋數椽古所邊半湖蘆葦半篙煙
去年拋卻農家事始信漁村水作田

中注湖或作中柱今呼中洲湖在縣西北九十里滙天
門湖河及邑西心字湖南湖長塌湖團塌湖朱谷湖諸
水出金雞口入三臺湖近多淤淺

三臺湖在縣西北九十里方輿紀要云湖中有三土臺

因名南連茫洞湖又南有田二河支津會重石河水過中洲湖至金雞口注之而雞鳴鄉諸湖港附焉西南有潞水源出京山磨石山見寰宇記過沙河見元和志南經天門縣治滙巾水至陳選口與天門竹橋各湖暨邑周陂鄉各皖畝水東至楊腰陂注之又陳選口分支北流東折左家渡入焉又有滙河水本京山縣前經天門五華山皂市合柳家河風波湖諸水流至紫營口會天門河北派注之又西有五龍河源出京邑林泉山會溫水見水經注至應城入縣境楊林東流注焉北有陳家河水自應城南來注之又有龍石河源出京山流經應城毛家河注之

見方輿紀要

按三臺湖接壤應城天門四邑之水滙之周凡百數十里爲西北之巨浸咸豐初漢水北溢七載相仍濁流淤成平地僅存一綫可通舟楫霖雨時至水無所瀦浸淫泛濫眠畝爲壑重以下游木子樹蔥擔溝楊子港柘樹口會滙入漢之道節節阻滯消涸無由停積爲患田地蘆洲沉沒焉有底止邑境惟西北最廣而墊溺之虐日甚談水利者通籌補救節宣疏濬可緩乎哉

黃金湖在縣西北百里舊赤壁街南西連銅頂湖司里

湖隨湖北通畱良湖東出稅務日昔年白芡紅菱參差掩映魚艇賈舶出沒往還邑中諸湖之最深廣者咸豐初漢水北溢悉淤

青草湖在縣西百里

邑人劉珊詩不買沃洲山開門對遙矚年年春草生替染湖光綠

港

麻埠港在縣東南五里卽漢水支流下流合於漢水舊志云大河自廟頭曲流至縣城三十餘里而此港僅十里最爲便捷明崇禎中嘗濬治之

漢川縣志

卷七

港

卅

按漢水分流入港而東北會縣西道觀湖水至縣東搬載口出與正流合自道光間上口旣堙港身亦淤淺狹

城隍港在縣西南十五里久淤舊志謂自天門城隍臺至鑽石磯疑誤

張陂港在縣北二十里安漢湖南今淤

楊子港在縣北二十里匯西北諸湖水自松湖口流經新河口而至柘樹口與澗水合今淤淺明邑令孫光祚聚兵據水拒流賊張獻忠於此舊志云港通應城天門惟夏水泛漲每爲盜舟出沒之所

明張鯤詩楊花飛飛大麥黃春水滿田當下秧浪喜
借來官府種不知醫是眼前瘡 漢川底事人號呼
爲說漢川通兩途岸上雄藩催稅稞江中大木攢皇
夫 長年三老愁不眠三江吳楚波相連多方津吏
已橫稅半夜縣官還擄船 天門龔慶謨詩繫纜依
沙渚維舟水驛東繁陰秋易雨老樹夜多風漸覺羅
衣薄長憐酒棧空雙湖隔煙霧歸夢杳難通

沙篙港在縣北三十里通澗水今淤

筍港亦名沈港在縣北三十里通澗水

螺師港在縣北三十五里今淤淺

漢川縣志

卷七

港

世二

麗水洪卽瀘水港在縣西四十餘里漢水支流自迎水
寺招兒河入雞公洲而來水道考云張池口東歧四十
里爲小里潭水轉而南入雞公洲麗水洪是漢水之委
於左者爲漢川之西北界舊志云在縣西南一百二十
里接沔陽界非也

車桂港在縣西南四十五里康熙間漢水徙成河

馬港在縣西六十里鰕子溝上十里許牛角灣出風門

河滙慈湖要津今埋塞

皂港在縣西九十里土人謂皂港河

曹木港在縣西一百十里

鰕子溝在縣西北六十里風門河下三里舊淺狹不容舟明隆慶後風門河塞漢北支津由之北出邵家嘴黃鱧溝在縣西小里潭沙臺寺下十五里許楊條民坑東舊淺狹咸豐初河岸沖決漢北支流由之滙注汴汙湖日漸深廣

六曲溝在南湖官坑北秋家溝下縣西九十里舊本蘆洲地自稅務口淤水道弗通民多惡疾遂掘之以引天門水經南湖官坑北東注中洲湖

山嶺溝在縣西百里陳選口分流之水注之

兩真菴溝在縣西北六十里太實官坑之北原非長流

漢川縣志

卷七

溝

四

自道光二年後襄水屢溢故道多堙湖河坑畝之水由此注慈湖惜不深廣

楊林溝在縣西南六十里

北字溝卽百枝溝在縣西南七十里接沔陽芳洲坑界雞鳴汙在縣西百里元順帝至正十六年報恩奴兵至雞鳴汙又元史徐壽輝作亂寬徹普化鎮武昌遣其子引舟師攻之至雞鳴汙水淺舟滯壽輝將倪文俊以火箭盡焚其舟卽此

按寬徹普化一統志作庫春布哈

湯三口在縣東一里卽文水溝出入到口舊會漢水今塞兩河口在縣南七里漢南支津舊流由此出會正流今淤爲平陸

羊蹄口亦名楊池口在縣南七里

韓牙口亦名黃牙口在縣東二里今淤

烏柏口在縣東北卽騰池河口今塞

徐公口在縣南二十五里

繫馬口在縣東南二十五里漢水經流處相傳關聖繫

馬處今設有塘汎

詳兵防

汪師口亦名汪泗口在縣南三十里

漢川縣志

卷七

口

七

蚌湖口在縣西南三十里漢流所經設有塘汎

詳軍政

車柱口在縣西南四十里久淤

鴨湖渡口在縣西南六十里接沔陽界往來者甚眾

黃柏口在縣西七十里小里潭東漢水支流所經也

柘樹口在縣北二十里北接涇水南接牛溝彌勒湖楊

子港會西北湖畝水達漢今淤淺設有塘汎

詳軍政

按柘樹口爲湖水合涇涇水會漢要津節年襄涇西

來江水逆洄淤塞二十餘里致涇口一帶淺狹不通

舟楫西北四鄉田地蘆洲涸復無由偶值霖雨茫然

巨浸墊溺之害視昔尤劇

新河口在縣北二十五里柘樹口上邑西北湖水出此
會湏上通德安一統志云明萬曆中江水衝啣而成後
居民商賈日以繁盛

牛落河口卽牛落湖口在縣北三十里湏水分流由之
北會孝感諸湖水入江

黃州顧景星詩冬水及馬腹牛落新渡頭青山落荒
葉白霧隱行舟欲雨村楓暗輕寒晚稻收楚江足洲
渚浩蕩羨沙鷗

縣河口在縣東北三十里設有塘汎咸豐五年鹽道常
恩領兵戰敗於此詳軍政

曹家場口在縣東北四十里道光間霖雨急灑沖刷而
成西北湖畷之水賴以暢達正流今爲居民阻塞
草廟口亦名新河口在縣東北五十里長灣四牌下約
洪湖松湖慈湖沔沔湖諸水分流入漢要津道光七年
嵩制軍奏准借帑疏濬今淤

湏口在縣東北六十里水經注湏水又南分爲二東通
瀟水西入於沔謂之湏口水道提綱云澁湏諸水自隨
州南流會德安雲夢應城數縣水來注之晉書建興元
年陶侃爲杜曾所敗將奔湏口又侃將吏鄭攀馬雋等
帥眾徙屯湏口是也康熙二十七年宜昌嚴總兵敗夏

賊於此咸豐六年湖廣總督官文恭統兵駐此遏賊上
竄詳軍政

按澗口舊爲澆澗諸水入漢之口道光初漢水奪胡
蘆涇東趨徙於下五里漢陽境之新溝入漢 漢川
五鄉西北居其四田賦誠繁庶矣然其西接巾臺河
天門湖河之水來焉西南通牛蹄口漢北支流來焉
西北近京山汊水及五龍河水來焉又西北連應城
富水又來焉又西北接雲夢澗水又來焉諸水皆滌
聚於三臺河汊松湖彌勒湖楊子港逶迤會澗入漢
江故西北四鄉眾水之匯也而澗又四鄉諸水之所
無歲無之蓋下流壅耳

漢川縣志

卷七

口

七

會也洩於澗口分出五通口地勢使然西北之水患
宋曾鞏詩我行去此二十年澗水不改舊潺湲風光
滿眼宛如昨故人乘鸞獨騰騫令人隨我不如昔我
記昔游何處言淚向幽襟落如瀉况聞江漢斷腸猿
明潘之恒詩漢口至澗口晨昏兩見星開蓬荒霧
白繫纜斷煙青蛾月閨情觸漁歌旅夢醒朱絃彈不
盡容易感湘靈 魏憲詩獨戍臨江鼓角鳴孤舟維
處旅夢驚烽傳海嶠家何在壘築湘沅路幾程月與
三分隨酒至雲無半點逐波生風光如許誰同賞永

夜勞勞自不平 邑人喻文鏊詩夕陽沙鳥白蘋洲
蟹舍漁村事事幽取次卸颿湏口泊蕭蕭寒雨一天
秋

掛口在縣北二十里松湖水由之出柘樹口道光初淤
知縣呂濬之今仍淺狹

府河口在縣西北三十里湏水由隨州安陸雲夢流經
應城長江埠來會邑西北上游之水流五里過劉家壩
又八里過安河又八里爲牛落河神靈口分三流北經
注泉鋪出孝感八埠口東流茶湖溝會孝感諸湖水入
江南由柘樹口出湏口入漢

漢川縣志

卷七

口

共

按注泉鋪卽今西港河舊本由孝感八埠口流入今
由八埠港出

邑人周鏞水利說曰治水者先治其委下流有所洩
斯上流有所歸禹貢九河旣道蓋以兗地卑下必先
施功於此而後冀豫諸州之水始有所受也湏口爲
湏水會漢正流稍南則應城河水東流入川邑之縣
河口會之又南則皂市河水流入川邑之三臺茫洞
中洲河汊等湖東流會之又南則永隆河水東入周
陂諸湖逶迤至楊腰陂邵家觜河等處東流會之又
稍東南則川邑西北之官民垸畝瀆水出河汊慈湖

松湖由河口掛口等處會之去小來大偶值淫霖泛溢爲害遇鍾京天門上游襄隄潰決如頂灌足汪洋巨浸瀰漫百里無不成災此近今數十年成案之歷歷可稽也出口如瓶來源似海終歲停積以水爲家漢川惟西北疆域最廣若江漢二流同時並漲則一縣之大僅存東南一隅幾面高峯拍浮水面尙何以爲一邑乎詢訪鄉耆博採輿論僉謂邑水以漢爲壑漢水以江爲壑邑水必多其入漢之路漢水必多其入江之路而後可查漢流至鍾祥以下南岸分三大支津徑自達江不與正流合所以數十年前雖有潦

歲不致過劇今茲潛沔南岸之支津堙塞已久下游正流以一河受四河之水昔時二三尺之漲今必以丈計昔時丈餘之漲今當何如而流至漢川界內又潰水旺流橫亘口面此隄愈高而愈無以堵禦之由也查漢口沿江下四十里北岸黃岡黃陂界內有五湖出江之五通口上通漢陽直北之牛落湖孝邑潯河正流入之又西通孝邑南境之四牙口與川邑之劉家壩東北之縣河口會潰潰流旺則由西南灌東北亦可稍殺潰勢而河身迂迴盤曲消水無幾爲今之計莫若在川邑劉家壩東北左近地方四水交滙

之區相度地勢於南高北下處所或垸或畝開成河身直引入湏之流徑達五通口入江長年急溜冲刷成河且兩岸均屬孝邑草地於彼處糧田亦無妨礙是分湏水之正流卽分漢水之正流不啻開一徑自達江之引河也或曰孝邑之人持引大流入境之說從而阻撓奈何曰是可以理論也劉家壩左近垸畝爲川邑最低之處而高於孝邑牛落湖數尺水小則旋長旋消無所增損水大則漢川灌盡之後孝邑水鄉亦必一律瀰漫同盡而後止幾見西水大泛之年川邑淹沒而孝邑南鄉有不受水成災者耶是無慮

漢川縣志

卷七

口

旱

也

神靈口在縣北三十里

臺口在縣西北三十里劉家壩東近寶花臺

三塘口在縣西十里許北通沔漢湖

七里口在縣西北四十里

排子口在縣西六十里小里潭沙臺寺下明嘉靖間漢

水大溢自河口至東湖流水口淤塞一千三百一十二

丈巡撫劉慤開濬之

水口在縣西五十里雞公洲上彭公六湖兩垸之間

天門譚蔚齡詩石橋行過欲棲鴉爛漫紅枝水口斜

笑我近春無事日殘陽十里看桃花

流水口在排子口下舊河身甚曲明嘉靖間改直以順水性

河口在縣西六十里小里潭下其北爲沙臺寺漢流至此歧東南入雞公洲麗水洪又東南趨城隍港會漢東北注河汊湖前明屢開屢淤今塞

百埠口亦名八埠口在縣西北七十里與應城分界木剝口在縣西北六十里鰕子溝下通上游諸湖之水今淤淺

張池口在縣西八十里尹中丞應元世居其地漢流由

漢川縣志

卷七

口

四

天門牛蹄口入境至此分南北流南出沔屬脈旺菊會正流北由竹筒河經劉家壩出澗口會正流

大橋口在縣西九十里田二河東今淤

稅務口今名三河口在縣西北九十里南會重石河燕子灣河西接天門河經牛角灣楊腰陂出金雞口入三臺湖今淤

陳選口在新口河下縣西北一百里天門縣河水入境分東北流北流折左家渡匯三臺湖今中塞東流經吳正口折秋家溝入中洲湖

扎營口在縣西北百十里上接天門巾臺河下經呂家

港入三臺湖

新鮮口在縣西北鄉今失所在

塘堰

觀陂塘在城南關之西關外曰外關陂關內曰裏關陂

朱家塘在伏龍山西北

七星塘在縣北三十里劉家埭

鄒家堰在南湖官埭南野水四圍風物孤清夏時荷香數里延緣洲間遊其地者疑在明湖千頃中

唐家堰在縣西北一百里漑田甚廣

池

漢川縣志

卷七

塘堰

池泉

四

養魚池有二一在縣南十里姚兒埭內一在縣東南三十里養魚約

天鵝池有二一在縣西北十里許又名坑一在縣南六十里今淤土人呼天鵝沖

泉

九眼泉在梅城鄉白石湖南三里許相傳晉吳猛遊此白龍泉在縣南三十里高觀山下舊志云相傳有白龍蜿蜒其處又西北六里許有鎖泉濱襄河曰鎖泉埠

觀音泉在縣南三十五里

詳名蹟

金泉銀泉俱在縣南六十里龍門山中

井

文水井在城北關內學宮西

王家井在城內王家山下

邵家井在歡樂門外

高觀橋井在高觀山下今廢

明知縣饒傑記曰高觀橋當漢陽之衝井次於橋南
傑嘗過之見行者挈瓶以汲於井瓶罄而汲者再飲
者續往來井井其有窮乎傑歎曰非橋無以通往來
非井無以濟往來之飢渴者相依爲用旁有道人願
請其旨傑告之曰天下無不偶之物相因爲用者至

漢川縣志

卷七

井

三

足矣豈直橋依於井云乎道人謝曰富哉先是穿井
義民劉大本曰吾竭力以爲是并非徒濟一人將使
人人無不濟也傑微笑策馬而去他日過大本誦其
事曰子有志於濟人久矣一井之功如此况行道濟
天下者耶易曰木上有水井君子以勞民勸相昔與
道人言其易之義歟井有亭亭有石願勒斯言以爲
行道者之勸也

石井在西關內校士館前

娘娘井在縣西采芝山南